

一切佛經及闡揚佛法諸書。無不令人趨吉避凶。改過遷善。明三世之因果。識本具之佛性。出生死之苦海。生極樂之蓮邦。讀者必須生感恩心。作難遭想。淨手潔案。主敬存誠。如面佛天。如臨師保。則無邊利益。自可親得。若肆無忌憚。任意褻瀆。及固執管見。妄生毀謗。則罪過彌天。苦報無盡。奉勸世人。當遠罪求益。離苦得樂也。

微悟禪師示衆

- 一、眞爲生死發菩提心。是學道通途。
- 二、以深信願。持佛名號。爲淨土正宗。
- 三、以攝心專注而念。爲下手方便。
- 四、以折伏現行煩惱。爲修心要務。
- 五、以堅持四重戒法。爲入道根本。
- 六、以種種苦行。爲修道助緣。
- 七、以一心不亂。爲淨行歸宿。
- 八、以種種靈瑞。爲往生證驗。

大方廣佛華嚴經普賢行願品
妙法蓮華經觀世音菩薩普門品
地藏菩薩本願經

大方廣佛華嚴經普賢菩薩行願品

唐尉賓國三藏般若奉詔譯

爾時普賢菩薩摩訶薩。稱歎如來勝功德已。告諸菩薩及善財言。善男子。如來功德。假使十方一切諸佛。經不可說不可說佛刹極微塵數劫。相續演說。不可窮盡。若欲成就此功德門。應修十種廣大行願。何等爲十。一者禮敬諸佛。二者稱讚如來。三者廣修供養。四者懺悔業障。五者隨喜功德。六者請轉法輪。七者請佛住世。八者常隨佛學。九者恆順衆生。十者普皆迴向。善財白言。大聖。云何禮敬。乃至迴向。

普賢菩薩告善財言。善男子。言禮敬諸佛者。所有盡法界虛空界。十方三世一切佛刹極微塵數諸佛世尊。我以普賢行願力故。深心信解。如對目前。悉以清淨身語意業。常修禮敬。一一佛所。皆現不可說不可說佛刹極微塵數身。一一身。徧禮不可說不可說佛刹極微塵數佛。虛空界盡。我禮乃盡。以虛空界不可盡故。我此禮敬。無有窮盡。如是乃至衆生界盡。衆生業盡。衆生煩惱盡。我禮乃盡。而衆生界乃至煩惱。無有盡故。我此禮敬。無有窮盡。念念相續。無有間斷。身語意業。無有疲厭。

復次。善男子。言稱讚如來者。所有盡法界虛空界。十方三世一切刹土。所有極微一一塵中。皆有一切世間極微塵數佛。一一佛所。皆有菩薩海會圍遶。我當悉以甚深勝解。現前知見。各以出過辯才天女微妙舌根。一一舌根。出無盡音聲海。一一音聲。出一切言辭海。稱揚讚歎一切如來諸功德海。窮未來際。相續不斷。盡於法界。無不周徧。如是虛空界盡。衆生界盡。衆生業盡。衆生煩惱盡。我讚乃盡。而虛空界乃至煩

惱。無有盡故。我此讚歎。無有窮盡。念念相續。無有間斷。身語意業。無有疲厭。

復次。善男子。言廣修供養者。所有盡法界。虛空界。十方三世一切佛刹。極微塵中。一一各有一切世界。極微塵數佛。一一佛所。種種菩薩海會圍遶。我以普賢行願力故。起深信解。現前知見。悉以上妙諸供養具。而爲供養。所謂華雲。鬘雲。天音樂雲。天傘蓋雲。天衣服雲。天種種香。塗香。燒香。末香。如是等雲。一一量如須彌山王。然種種燈。酥燈。油燈。諸香油燈。一一燈炷如須彌山。一一燈油如大海水。以如是等諸供養具。常爲供養。善男子。諸供養中。法供養最。所謂如說修行供養。利益衆生供養。攝受衆生供養。代衆生苦供養。勤修善根供養。不捨菩薩業供養。不離菩提心供養。善男子。如前供養無量功德。比法供養一念功德。百分不及一。千分不及一。百千俱胝那由他分。迦羅分。算分。數分。喻分。優波尼沙陀分。亦不及一。何以故。以諸如來尊重法故。以如說行。出生諸佛故。若諸菩薩行法供養。則得成就供養如來。如是修行。是真供養故。此廣大最勝供養。虛空界盡。衆生界盡。衆生業盡。衆生煩惱盡。我供乃盡。而虛空界乃至煩惱不可盡故。我此供養亦無有盡。念念相續。無有間斷。身語意業。無有疲厭。

復次。善男子。言懺悔業障者。菩薩自念。我於過去無始劫中。由貪瞋癡。發身口意。作諸惡業。無量無邊。若此惡業有體相者。盡虛空界不能容受。我今悉以清淨三業。徧於法界。極微塵刹。一切諸佛菩薩衆前。誠心懺悔。後不復造。恆住淨戒。一切功德。如是虛空界盡。衆生界盡。衆生業盡。衆生煩惱盡。我懺乃盡。而虛空界乃至衆生煩惱不可盡故。我此懺悔無有窮盡。念念相續。無有間斷。身語意業。無有疲厭。

復次。善男子。言隨喜功德者。所有盡法界虛空界。十方三世一切佛刹極微塵數。諸佛如來。從初發心。爲一切智。勤修福聚。不惜身命。經不可說不可說佛刹極微塵數劫。一一劫中。捨不可說不可說佛刹極微塵數頭目手足。如是一切難行苦行。圓滿種種波羅蜜門。證入種種菩薩智地。成就諸佛無上菩提。及般涅槃。分布舍利。所有善根。我皆隨喜。及彼十方一切世界。六趣四生。一切種類。所有功德。乃至一塵。我皆隨喜。十方三世一切聲聞。及辟支佛。有學無學。所有功德。我皆隨喜。一切菩薩所修無量難行苦行。志求無上正等菩提。廣大功德。我皆隨喜。如是虛空界盡。衆生界盡。衆生業盡。衆生煩惱盡。我此隨喜無有窮盡。念念相續。無有間斷。身語意業。無有疲厭。

復次。善男子。言請轉法輪者。所有盡法界虛空界。十方三世一切佛刹極微塵中。一一各有不可說不可說佛刹極微塵數。廣大佛刹。一一刹中。念念有不可說不可說佛刹極微塵數。一切諸佛成等正覺。一切菩薩海會圍遶。而我悉以身口意業種種方便。殷勤勸請。轉妙法輪。如是虛空界盡。衆生界盡。衆生業盡。衆生煩惱盡。我常勸請一切諸佛轉正法輪。無有窮盡。念念相續。無有間斷。身語意業。無有疲厭。

復次。善男子。言請佛住世者。所有盡法界虛空界。十方三世一切佛刹極微塵數。諸佛如來。將欲示現般涅槃者。及諸菩薩聲聞緣覺。有學無學。乃至一切諸善知識。我悉勸請莫入涅槃。經於一切佛刹極微塵數劫。爲欲利樂一切衆生。如是虛空界盡。衆生界盡。衆生業盡。衆生煩惱盡。我此勸請無有窮盡。念念相續。無有間斷。身語意業。無有疲厭。

復次。善男子。言常隨佛學者。如此娑婆世界毗盧遮那如來。從初發心。精進不退。以不可說不可說身命而爲布施。剝皮爲紙。析骨爲筆。刺血爲墨。書寫經典。積如須彌。爲重法故。不惜身命。何況王位城邑聚落宮殿園林一切所有。及餘種種難行苦行。乃至樹下成大菩提。示種種神通。起種種變化。現種種佛身。處種種衆會。或處一切諸大菩薩衆會道場。或處聲聞及辟支佛衆會道場。或處轉輪聖王小王眷屬衆會道場。或處刹利及婆羅門長者居士衆會道場。乃至或處天龍八部人非人等衆會道場。處於如是種種衆會。以圓滿音。如大雷震。隨其樂欲。成熟衆生。乃至示現入於涅槃。如是一切我皆隨學。如今世尊毗盧遮那如是。盡法界虛空界。十方三世一切佛刹。所有塵中一切如來。皆亦如是。於念念中。我皆隨學。如是虛空界盡。衆生界盡。衆生業盡。衆生煩惱盡。我此隨學。無有窮盡。念念相續。無有間斷。身語意業。無有疲厭。

復次。善男子。言恆順衆生者。謂盡法界虛空界。十方刹海所有衆生。種種差別。所謂卵生。胎生。濕生。化生。或有依於地水火風而生住者。或有依空及諸卉木而生住者。種種生類。種種色身。種種形狀。種種相貌。種種壽量。種種族類。種種名號。種種心性。種種知見。種種欲樂。種種意行。種種威儀。種種衣服。種種飲食。處於種種村營聚落城邑宮殿。乃至一切天龍八部人非人等。無足二足四足多足。有色無色。有想無想。非有想。非無想。如是等類。我皆於彼隨順而轉。種種承事。種種供養。如敬父母。如奉師長。及阿羅漢。乃至如來等。無有異。於諸病苦。爲作良醫。於失道者。示其正路。於闇夜中。爲作光明。於貧窮者。令得伏藏。菩薩

如是平等饒益一切衆生。何以故。菩薩若能隨順衆生。則爲隨順供養諸佛。若於衆生尊重承事。則爲尊重承事如來。若令衆生歡喜者。則令一切如來歡喜。何以故。諸佛如來。以大悲心而爲體故。因於衆生而起大悲。因於大悲生菩提心。因菩提心成等正覺。譬如曠野沙磧之中。有大樹王。若根得水。枝葉華果。悉皆繁茂。生死曠野。菩提樹王。亦復如是。一切衆生而爲樹根。諸佛菩薩而爲華果。以大悲水饒益衆生。則能成就諸佛菩薩智慧華果。何以故。若諸菩薩以大悲水饒益衆生。則能成就阿耨多羅三藐三菩提。故。是故菩提屬於衆生。若無衆生。一切菩薩終不能成無上正覺。善男子。汝於此義。應如是解。以於衆生心平等故。則能成就圓滿大悲。以大悲心隨衆生故。則能成就供養如來。菩薩如是隨順衆生。虛空界盡。衆生界盡。衆生業盡。衆生煩惱盡。我此隨順。無有窮盡。念念相續。無有間斷。身語意業。無有疲厭。

善男子。是爲菩薩摩訶薩十種大願。具足圓滿。若諸菩薩於此大願隨順趣入。則能成熟一切衆生。則能隨順阿耨多羅三藐三菩提。則能成滿普賢菩薩諸行願海。是故善男子。汝於此義。應如是知。若有善男

子善女人。以滿十方無量無邊不可說不可說佛刹極微塵數一切世界上妙七寶。及諸人天最勝安樂。布施爾所一切世界所有衆生。供養爾所一切世界諸佛菩薩。經爾所佛刹極微塵數劫。相續不斷。所得功德。若復有人。聞此願王。一經於耳。所有功德。比前功德。百分不及一。千分不及一。乃至優波尼沙陀分。亦不及一。或復有人。以深信心。於此大願受持讀誦。乃至書寫一四句偈。速能除滅五無間業。所有世間身心等病。種種苦惱。乃至佛刹極微塵數一切惡業。皆得消除。一切魔軍。夜叉羅刹。若鳩槃荼。若毗舍闍。若部多等。飲血啖肉諸惡鬼神。皆悉遠離。或時發心親近守護。是故若人誦此願者。行於世間。無有障礙。如空中月。出於雲翳。諸佛菩薩之所稱讚。一切人天皆應禮敬。一切衆生悉應供養。此善男子。善得人身。圓滿普賢所有功德。不久當如普賢菩薩。速得成就微妙色身。具三十二大丈夫相。若生人天。所在之處。常居勝族。悉能破壞一切惡趣。悉能遠離一切惡友。悉能制伏一切外道。悉能解脫一切煩惱。如師子王。摧伏羣獸。堪受一切衆生供養。又復是人臨命終時。最後刹那。一切諸根悉皆散壞。一切親屬悉皆捨離。一切威勢悉皆退失。輔相大臣。宮城內外。象馬車乘。珍寶伏藏。如是一切。無復相隨。唯此願王。不相捨離。於一切時。引導其前。一刹那中。卽得往生極樂世界。到已。卽見阿彌陀佛。文殊師利菩薩。普賢菩薩。觀自在菩薩。彌勒菩薩等。此諸菩薩。色相端嚴。功德具足。所共圍遶。其人自見生蓮華中。蒙佛授記。得授記已。經於無數百千萬億那由他劫。普於十方不可說不可說世界。以智慧力。隨衆生心而爲利益。不久當坐菩提道場。降伏魔軍。成等正覺。轉妙法輪。能令佛刹極微塵數世界衆生。發菩提心。隨其根性。教化成熟。

乃至盡於未來劫海。廣能利益一切衆生。善男子。彼諸衆生。若聞若信此大願王。受持讀誦。廣爲人說。所有功德。除佛世尊。餘無知者。是故汝等聞此願王。莫生疑念。應當諦受。受已能讀。讀已能誦。誦已能持。乃至書寫。廣爲人說。是諸人等。於一念中。所有行願。皆得成就。所獲福聚。無量無邊。能於煩惱大苦海中。拔濟衆生。令其出離。皆得往生阿彌陀佛極樂世界。爾時普賢菩薩摩訶薩。欲重宣此義。普觀十方而說偈言。

所有十方世界中	三世一切人師子	我以清淨身語意	一切徧禮盡無餘
普賢行願威神力	普現一切如來前	一身復現刹塵身	一一徧禮刹塵佛
於一塵中塵數佛	各處菩薩衆會中	無盡法界塵亦然	深信諸佛皆充滿
各以一切音聲海	普出無盡妙言辭	盡於未來一切劫	讚佛甚深功德海
以諸最勝妙華鬘	伎樂塗香及傘蓋	如是最勝莊嚴具	我以供養諸如來
最勝衣服最勝香	末香燒香與燈燭	一一皆如妙高聚	我悉供養諸如來
我以廣大勝解心	深信一切三世佛	悉以普賢行願力	普徧供養諸如來
我昔所造諸惡業	皆由無始貪瞋癡	從身語意之所生	一切我今皆懺悔
十方一切諸衆生	二乘有學及無學	一切如來與菩薩	所有功德皆隨喜
十方所有世間燈	最初成就菩提者	我今一切皆勸請	轉於無上妙法輪

諸佛若欲示涅槃 我悉至誠而勸請
所有禮讚供養福 請佛住世轉法輪
我隨一切如來學 修習普賢圓滿行
未來一切天人師 一切意樂皆圓滿
所有十方一切刹 廣大清淨妙莊嚴
十方所有諸衆生 願離憂患常安樂
我爲菩提修行時 一切趣中成宿命
天龍夜叉鳩槃荼 乃至人與非人等
勤修清淨波羅蜜 恆不忘失菩提心
於諸惑業及魔境 世間道中得解脫
悉除一切惡道苦 等與一切羣生樂
我常隨順諸衆生 盡於未來一切劫
所有與我同行者 於一切處同集會
所有益我善知識 爲我顯示普賢行
願常面見諸如來 及諸佛子衆圍遶
唯願久住刹塵劫 利樂一切諸衆生
隨喜懺悔諸善根 迴向衆生及佛道
供養過去諸如來 及與現在十方佛
我願普隨三世學 速得成就大菩提
衆會圍繞諸如來 悉在菩提樹王下
獲得甚深正法利 滅除煩惱盡無餘
常得出家修淨戒 無垢無破無穿漏
所有一切衆生語 悉以諸音而說法
滅除障垢無有餘 一切妙行皆成就
猶如蓮華不著水 亦如日月不住空
如是經於刹塵劫 十方利益恆無盡
恆修普賢廣大行 圓滿無上大菩提
身口意業皆同等 一切行願同修學
常願與我同集會 於我常生歡喜心
於彼皆興廣大供 盡未來劫無疲厭

願持諸佛微妙法	光顯一切菩提行	究竟清淨普賢道	盡未來劫常修習
我於一切諸有中	所修福智恆無盡	定慧方便及解脫	獲諸無盡功德藏
一塵中有塵數刹	一一刹有難思佛	一一佛處衆會中	我見恆演菩提行
普盡十方諸刹海	一一毛端三世海	佛海及與國土海	我徧修行經劫海
一切如來語清淨	一言具衆音聲海	隨諸衆生意樂音	一一流佛辯才海
三世一切諸如來	於彼無盡語言海	恆轉理趣妙法輪	我深智力普能入
我能深入於未來	盡一切劫爲一念	三世所有一切劫	爲一念際我皆入
我於一念見三世	所有一切人師子	亦常人佛境界中	如幻解脫及威力
於一毛端極微中	出現三世莊嚴刹	十方塵刹諸毛端	我皆深入而嚴淨
所有未來照世燈	成道轉法悟羣有	究竟佛事示涅槃	我皆往詣而親近
速疾周徧神通力	普門徧入大乘力	智行普修功德力	威神普覆大慈力
徧淨莊嚴勝福力	無著無依智慧力	定慧方便威神力	普能積集菩提力
清淨一切善業力	摧滅一切煩惱力	降伏一切諸魔力	圓滿普賢諸行力
普能嚴淨諸刹海	解脫一切衆生海	善能分別諸法海	能甚深入智慧海
普能清淨諸行海	圓滿一切諸願海	親近供養諸佛海	修行無倦經劫海

三世一切諸如來	最勝菩提諸行願	我皆供養圓滿修	以普賢行悟菩提
一切如來有長子	彼名號曰普賢尊	我今迴向諸善根	願諸智行悉同彼
願身口意恆清淨	諸行剎土亦復然	如是智慧號普賢	願我與彼皆同等
我爲徧淨普賢行	文殊師利諸大願	滿彼事業盡無餘	未來際劫恆無倦
我所修行無有量	獲得無量諸功德	安住無量諸行中	了達一切神通力
文殊師利勇猛智	普賢慧行亦復然	我今迴向諸善根	隨彼一切常修學
三世諸佛所稱歎	如是最勝諸大願	我今迴向諸善根	爲得普賢殊勝行
願我臨欲命終時	盡除一切諸障礙	面見彼佛阿彌陀	卽得往生安樂剎
我既往生彼國已	現前成就此大願	一切圓滿盡無餘	利樂一切衆生界
彼佛衆會咸清淨	我時於勝蓮華生	親覩如來無量光	現前授我菩提記
蒙彼如來授記已	化身無數百俱胝	智力廣大徧十方	普利一切衆生界
乃至虛空世界盡	衆生及業煩惱盡	如是一切無盡時	我願究竟恆無盡
十方所有無邊剎	莊嚴衆寶供如來	最勝安樂施天人	經一切剎微塵劫
若人於此勝願王	一經於耳能生信	求勝菩提心渴仰	獲勝功德過於彼
卽常遠離惡知識	永離一切諸惡道	速見如來無量光	具此普賢最勝願

此人善得勝壽命 此人善來人中生 此人不久當成就 如彼普賢菩薩行

往昔由無智慧力 所造極惡五無間 誦此普賢大願王 一念速疾皆消滅

族姓種類及容色 相好智慧咸圓滿 諸魔外道不能摧 堪爲三界所應供

速詣菩提大樹王 坐已降伏諸魔衆 成等正覺轉法輪 普利一切諸含識

若人於此普賢願 讀誦受持及演說 果報唯佛能證知 決定獲勝菩提道

若人誦此普賢願 我說少分之善根 一念一切悉皆圓 成就衆生清淨願

我此普賢殊勝行 無邊勝福皆迴向 普願沈溺諸衆生 速往無量光佛刹

爾時普賢菩薩摩訶薩。於如來前。說此普賢廣大願王清淨偈已。善財童子踊躍無量。一切菩薩皆大歡喜。如來讚言。善哉善哉。爾時世尊。與諸聖者菩薩摩訶薩。演說如是不可思議解脫境界勝法門時。文殊師利菩薩而爲上首。諸大菩薩。及所成熟六千比丘。彌勒菩薩而爲上首。賢劫一切諸大菩薩。無垢普賢。菩薩而爲上首。一生補處。住灌頂位。諸大菩薩。及餘十方種種世界。普來集會。一切刹海。極微塵數諸菩薩摩訶薩衆。大智舍利弗。摩訶目犍連等。而爲上首。諸大聲聞。并諸人天一切世主。天龍。夜叉。乾闥婆。阿脩羅。迦樓羅。緊那羅。摩睺羅伽。人非人等。一切大衆。聞佛所說。皆大歡喜。信受奉行。

大方廣佛華嚴經普賢行願品

略注○【大方廣佛華嚴經】略稱華嚴經。八十卷（唐實叉難陀譯）。四十卷（即普賢其義廣大。諸大乘經之通名也。華。同花。有六十卷（晉佛陀跋陀羅譯）。行願品。唐般若譯）之三本。大方廣者。謂嚴莊嚴之義。【普賢行願品】爲入不思

【海】利。爲土田之義。利海。謂十方無量世界。喻之如海也。【色身】謂有形之色身也。猶言肉身。【有色】欲界與色界之衆生有色身者。【無色】無色界之衆生無色身者。【有想】有心想之衆生。無想。外道修無想定而生於色界之無想天。五百劫間無心想之衆生。【非有想非無想】生於無色界之第四處。無有下地粗想之煩惱。故曰非有想。而又非無細想之煩惱。故曰非無想。【阿羅漢】略稱羅漢。聲聞乘之極果也。【阿耨多羅三藐三菩提】見無上正等菩提。【惡趣】亦稱惡道。謂地獄。餓鬼。畜生也。【七寶】金。銀。琉璃。珊瑚。琥珀。或玻璃。瑪瑙。眞珠。或珊瑚。琥珀。或玻璃。瑪瑙。所猶言如許。【願王】莫大之誓願也。【極藝切音忌】義譯爲頌。爲詩歌體之語。【五無間業】亦稱五逆罪。應墮無間地獄之五種大罪業也。【夜叉】梵語。亦作藥叉。義譯爲捷疾鬼。【羅刹】梵語。惡鬼之稱。利音察。【鳩槃荼】亦作毘舍遮。持國天所領鬼之名稱。或云顛狂鬼。或云啖精鬼。毗音琵琶。閼音蛇。【部多】一種化生之鬼類。【三十二大丈夫相】佛身上三十二種之妙相也。【外道】不受佛法。而行不合真理之邪法者也。【利那】梵語。時之短促者。【根】能生之義。如眼耳鼻舌身。意。謂之六根。以其能對境而生識。故名。【阿彌陀佛】無有衆苦。但受諸樂。故名。【阿彌陀佛】

義譯爲無量壽佛。或無量光佛。西方極樂世界之教主也。【文殊師利】亦作曼殊室利。義譯爲妙德。妙吉祥。【觀自在菩薩】即觀世音菩薩。觀機往救。自在無礙。故名。【彌勒菩薩】姓阿逸多。生南天竺婆羅門家。釋迦佛惡記其將來繼紹佛位。廣度人天。彌勒。義譯曰慈氏。授記。佛對菩薩等惡記其將來必當作佛。謂之授記。【人師子】佛之稱號。佛於人中。猶如獅子也。【利塵】無量數之義。【妙高】須彌之義。譯。喻精聚之多如須彌山也。【二乘】聲聞乘緣覺乘也。開佛說四諦法。因而證道者曰聲聞乘。自觀十二因緣而得道者曰緣覺乘。乘者。乘載衆生。使各到其果地之教法也。【大乘】諸佛菩薩正真正覺所行之道。以能滅除衆生大苦。與大利益。故名爲大。【惡知識】惡友。【三界】凡夫生死往來之三世界。一欲界。爲有淫欲與食欲之衆生住所。上自六欲天。下迄無間地獄。二色界。爲有形色之義。在欲界之上。爲無淫食二欲之衆生住所。分四級。稱四禪天。三無色界。以心識住於深妙之禪定。而無所謂物質身體。有四天。稱四無色天。【含識】猶言有情衆生。無量光佛。利。即阿彌陀佛。西方極樂世界之教主也。【寶剎】此世界現在之住劫名。以在界住劫二十增減中。有千佛出世。故名。其過去之住劫。名莊嚴劫。未來之住劫。名星宿劫。【一生補處】轉生即補佛處也。住灌頂位。謂不退於無上菩提。定紹

法王之位也。天竺國王登位時。以四大海水。灌於頂上。以表祝意。因以爲稱。【舍利弗】佛之十大弟子之一。在聲聞中智慧第一。【摩訶目犍連】亦作大目犍連。目犍連。目連。佛十大弟子之一。稱爲神通第一。犍音度。

附錄 ○釋弘寶。唐淄州鄒平縣人。少時莫癡。年三十五。忽遇一僧。教讀華嚴。除其宿障。寶乃精心懇志。晝夜披尋。方祈百遍。至四十餘遍。夜夢有人手執利刀。割癭將去。覺後六日。癭上生瘡。以手微按。出膿數合。自爾瘡癭漸消。卒就平復。則高宗咸亨二年之首也。【華嚴經傳記】。樊玄智。唐涇川人。年十六。捨家於京師。依此經。修普賢行。後每誦經。口中頻頻獲舍利。前後相仍。凡數百餘粒。後遊止坊州赤沙。鄉北之石窟。誦經之際。每有雜類鳥獸。咸萃林中。寂然無聲。以聽音德。豺虎猛獸。時亦馴伏。嘗爲惡人推墜巖下。雖懸岸百仞。宛然無損。同上。

釋普安。俗姓郭。京兆涇陽人。小時依圓禪師出家。明通三藏。常業華嚴。隋文帝時。結茅於終南山子午豹林兩谷合潤之側。四遠承風禮覲。潤左有素頭陀者。陰嫉安德。思將誅殛。與伴三人。持弓挾矢。攘臂挽絃。將欲放箭。箭不離絃。弓不離手。忽眼舌噤。立生經宿。唯得出叫喚而離。行路聞之。遠近雲會。鄉人稽首歸誠。

謝焉。安曰。余了不知。蓋華嚴力也。若欲除免。但令懺悔。如語教之。方蒙解脫。(同上)

朱君石僧。別名苦行居士。前供職京滬鐵路。自言在洛社車站時。有一日。夜間。常車到站。余正在月台上辦公。那時有一供職於水上警察的巡官。望見有一個好像佛的模樣。立在余的身旁。頭帶荷花帽。手執錫杖。面有白鬚。當日並未語余。三日後。伊特來訪余。先通姓名。繼則問余信何宗教。余告以信佛。不過念一句南無阿彌陀佛。伊遂將三日以前所見之事告余。觀此可信佛經上說。念佛的人平常有吉神護佑的話。確實不虛。(廣長舌)北通州王鐵珊者。前清曾作廣西藩臺。其時廣西土匪甚多。彼於作兵備道時。即設計剿滅其黨。所殺甚多。四年前得病。其重黑。有鬼無數。皆來逼迫。遂即驚醒。久則復合眼。其境仍如是。復驚醒。三晝夜不敢合眼。其人已奄奄一息。其妻因諭之曰。你如此。怎麼樣好。你念南無阿彌陀佛。吧。念佛總會好。鐵珊一聞此言。遂拚命念。未久。即睡著。遂睡一大覺。了無境界可得。而病亦漸漸癒矣。因長齋念佛。鐵珊前年與陳錫周來山。親與光說。(印光法師文鈔)李文啓居士。上海廣東路三五九號孔明電料行主。勤修六度。舉凡弘法利生之事。悉力以赴。彌為奮勵。自言。未信佛前。

於腎囊上患繡球癰。劇癢難忍。狂搔皮破。每致血赤淋漓。睡在被窩中。熱脹癢痛。尤為苦楚。如是者達十五年之久。百療莫效。某醫為合藥水一瓶。試敷患部之半。不料如沾膠水。腎囊銷蝕幾穿。即往廣慈醫院住療半月。藥水之蝕傷雖愈。而癰瘰依然。旋晤李圓淨居士。具道所苦。圓淨居士為言。今有一法。特不知你有無福分信受。即吃素念佛。是余說。吃素念佛。原來是要有福分的。我決心實行。不到一個月。劇癢全止。到第二個月。患部堆厚平薄。多年痼疾竟自霍然。始信佛為大醫王。悔非虛語云。(保安法稿本)

上海苦齋主人。崇奉三寶行菩薩道。博施財法。在餘姚路設有大陸造紙廠一所。民國三十四年五月十一日下午四時許。餘姚路發生大火。計燒去草棚三千餘間。工廠十餘家。街堂兩條。死傷十餘人。當燒至該廠時。風忽轉向。火即延燒他處。在一片焦土中。該廠如魯靈光之屹然獨存。且該廠並無高牆之阻隔。廠內又多草房。極易着火。竟爾幸免。非特回祿有靈。實仗我佛威神加持爾。(同上)

上海南行居士。奉佛茹素二十餘年。禮誦極虔。並發大心。行普賢願。設三樂糖菓廠於南市中華路七九九號。家居焉。於民國三十四年四月間。三歲之幼孫。於庭中獨玩。忽墮井中。井距居室頗遠。家人莫知。有一工人。午睡方覺。過庭盪手。不自知其所以然。手中乃握一巨繩。聞井中兒聲。即繫繩於井欄而縋下。兒抱工人之足而出。竟得無恙。在同一時間中。附近小兒之墮井者。有四人之多。其他三人均不救。曾手何用巨繩。而竟攜行。時間又如救。湊合。可知念佛行善之家。常為諸佛菩薩所攝護云云。實信而有徵。(同上)

佛示念佛十種功德 錄蓮池大師雲棲法集

一 若人持佛名號者。當獲十種功德利益。一晝夜常得諸天大力神將。并諸眷屬。隱形守護。

二 常得二十五大菩薩。如觀世音等。及一切菩薩。常隨守護。

三 常為諸佛晝夜護念。阿彌陀佛常放光明。攝受此人。

四 一切惡鬼。若夜叉羅刹。皆不能害。一切毒蛇毒龍毒藥。悉不能中。

五 一切火難水難。怨賊刀箭牢獄枷橫。死枉死。悉皆不受。

六 先所作罪。悉皆消滅。所殺怨命。咸蒙解脫。更無執對。

七 夜夢正直。或復夢見阿彌陀佛勝妙色身。

八 心常歡喜。顏色光澤。氣力充盛。所作吉利。

九 常為世間人民。恭敬供養。歡喜禮拜。猶如敬佛。

十 命終時。心無怖畏。正念現前。得見阿彌陀佛。并諸菩薩。手持金臺。接引往生西方淨土。盡未來際。受勝妙樂。

妙法蓮華經觀世音菩薩普門品

姚秦龜茲國三藏法師鳩摩羅什譯

爾時無盡意菩薩。卽從座起。偏袒右肩。合掌向佛。而作是言。世尊。觀世音菩薩。以何因緣。名觀世音。佛告無盡意菩薩。善男子。若有無量百千萬億衆生。受諸苦惱。聞是觀世音菩薩。一心稱名。觀世音菩薩。卽時觀其音聲。皆得解脫。若有持是觀世音菩薩名者。設入大火。火不能燒。由是菩薩威神力故。若爲大水所漂。稱其名號。卽得淺處。若有百千萬億衆生。爲求金銀。琉璃。磲磬。瑪瑙。珊瑚。琥珀。眞珠等寶。入於大海。假使黑風吹其船舫。飄墮羅刹鬼國。其中若有乃至一人。稱觀世音菩薩名者。是諸人等。皆得解脫。羅刹之難。以是因緣。名觀世音。若復有人。臨當被害。稱觀世音菩薩名者。彼所執刀杖。尋段段壞。而得解脫。若三千大千國土。滿中夜叉。羅刹。欲來惱人。聞其稱觀世音菩薩名者。是諸惡鬼。尙不能以惡眼視之。況復加害。設復有人。若有罪。若無罪。桎械枷鎖。檢繫其身。稱觀世音菩薩名者。皆悉斷壞。卽得解脫。若三千大千國土。滿中怨賊。有一商主。將諸商人。齎持重寶。經過險路。其中一人。作是唱言。諸善男子。勿得恐怖。汝等應當一心稱觀世音菩薩名號。是菩薩能以無畏施於衆生。汝等若稱名者。於此怨賊。當得解脫。衆商人聞。俱發聲言。南無觀世音菩薩。稱其名故。卽得解脫。無盡意。觀世音菩薩摩訶薩。威神之力。巍巍如是。若有衆生。多於姪欲。常念恭敬觀世音菩薩。便得離欲。若多瞋恚。常念恭敬觀世音菩薩。便得離瞋。若多愚癡。常念恭敬觀世音菩薩。便得離癡。無盡意。觀世音菩薩。有如是等大威神力。多所饒益。是故衆生。常應心念。若有女人。設欲求男。禮拜供養觀世音菩薩。便生福德智慧之男。設欲求女。便生端正有相之女。宿

植德本。衆人愛敬。無盡意。觀世音菩薩。有如是力。若有衆生。恭敬禮拜觀世音菩薩。福不唐捐。是故衆生。皆應受持觀世音菩薩名號。無盡意。若有人受持六十二億恆河沙菩薩名字。復盡形供養。飲食。衣服。臥具。醫藥。於汝意云何。是善男子善女人。功德多不。無盡意言。甚多。世尊。佛言。若復有人。受持觀世音菩薩名號。乃至一時禮拜供養。是二人福。正等無異。於百千萬億劫。不可窮盡。無盡意。受持觀世音菩薩名號。得如是無量無邊福德之利。無盡意菩薩白佛言。世尊。觀世音菩薩。云何遊此娑婆世界。云何而爲衆生說法。方便之力。其事云何。佛告無盡意菩薩。善男子。若有國土衆生。應以佛身得度者。觀世音菩薩卽現佛身而爲說法。應以辟支佛身得度者。卽現辟支佛身而爲說法。應以聲聞身得度者。卽現聲聞身而爲說法。應以梵王身得度者。卽現梵王身而爲說法。應以帝釋身得度者。卽現帝釋身而爲說法。應以自在天身得度者。卽現自在天身而爲說法。應以大自在天身得度者。卽現大自在天身而爲說法。應以天大將軍身得度者。卽現天大將軍身而爲說法。應以毗沙門身得度者。卽現毗沙門身而爲說法。應以小王身得度者。卽現小王身而爲說法。應以長者身得度者。卽現長者身而爲說法。應以居士身得度者。卽現居士身而爲說法。應以宰官身得度者。卽現宰官身而爲說法。應以婆羅門身得度者。卽現婆羅門身而爲說法。應以比丘比丘尼。優婆塞。優婆夷身得度者。卽現比丘比丘尼。優婆塞。優婆夷身而爲說法。應以長者居士。宰官。婆羅門婦女身得度者。卽現婦女身而爲說法。應以童男童女身得度者。卽現童男童女身而爲說法。應以天龍。夜叉。乾闥婆。阿脩羅。迦樓羅。緊那羅。摩睺羅伽人。非人等身得度者。卽皆現之而